

橫
雲
山
人
集

橫雲山人集卷之二十二

雲間王鴻緒儼齋撰

還朝集

乙酉正月二日蒙

恩賜 御書福字恭紀

萬年景福 御楓宸入直 彤廬慶早春昨見

龍章頒戩穀今蒙 鳳翰及微臣

少昊作金天鸞鳳書

仰瞻

羲畫同天健共賀 箕疇與日新敬誦九如由

聖德衢歌都是太平人

正月五日蒙

恩賜玻璃魚缸一具酒壺一尊圍碟十二隻恭紀

玻璃珍器自西洋 天府神工製更良皓質辟塵

清徹骨

玻璃缸通明徹底

細絲微界炯生光

壺碟有細絲作界

殊恩頒下瓊霄殿盛事流傳白玉堂願矢臣懷同

皎潔一生冰雪報 君王

賦得太平天子朝元日

履端金殿日華新大小共球玉陸陳五色雲中千

曆啟九成樂裏萬方春山皆呼歲尊 天子海不

揚波識 聖人更慶穹蒼歆 至德豐登嘉瑞報

元辰

正月六日

上親詣

郊壇祈穀前一夕瑞雪四布恭紀二律

上辛祀典著祈年曩代嘗傳攝事虔

唐宋明多遣官代祭

我 聖皇勤饗帝總懷兆姓食爲天泰壇夙戒陳

蒼壁 龍袞凌晨拂紫煙金版祝詞皆 睿指

祝詞

內閣奉命重撰居歆早格豆登先

其二

皇心帝鑒默相通明德馨聞一氣中詰旦絳雲方
命駕經宵皓雪已飄風千官肅拜徵天瑞萬國深

耕卜歲豐

執禮更瞻

乾體健

登降拜獻禮數甚繁而聖躬

不覺其勞從官欽頌

綿綿景福自攸同

題仇十洲織錦圖

秋月春花照綺幃
藁砧一去不言歸
粧成手揀千條縷
靜想迴文上錦機

其二

遠宦他鄉閱歲時
郎心離合倩誰知
黃金未買相如賦
且盡胸中宛轉詞

三月二十九日

聖駕幸臣小園

賜松竹匾額并對聯二幅

御製詩扇一柄時

臣鴻緒

在京遙受

恩榮喜溢

望外恭紀

歸雁音從雲水鄉爲傳鑿輅幸山莊誰知幽澗栽
葵藿也得傾心向太陽

其二

五茸僻處海東隅丘壑經營僅一區何意巡遊邀
睿賞茲山茲水不名愚

其三

岩間修竹似琅玕墻下蒼松復鬱盤帝爲開顏

揮寶翰輝煌龍榜碧雲端

其四

地近城隅繞碧湍居然小築洽宸歡特書明月
清泉句賜與堂中對景看

其五

四面園亭設御牀一時岩谷有輝光渚花庭果
成優鉢野鷺山禽變鳳凰

其六

當年岩徑產三芝五色光華見者奇謾道禎祥何
自驗豈知天子有來時

其七

賜金歸後買園林，嘗奉嚴親曳杖臨。
今日花間來步輦，深恩無盡是天心。

其八

村僮只合守茅茨，御駕親臨百不知。
却報皇情多悅豫，滿園桃柳倍華滋。

咏白杜鵑花

艷質天台夙擅名，冰姿獨立更誰榮。
蜀禽啼罷知無染，玉女來時倍有情。
開遍雲岩宜月映，移歸闌苑覺風清。
若教勅賜昭陽裏，不藉臙脂韻已生。

題贈楚中卜者

新雨長安道少人
春風東市淨無塵
同興宋賈來相訪
始信先生道入神

其二

我有雲松谷水陽
鑿興親幸爛生光
何時歸隱邀君去
同在松間註老莊

五月初九日

賜遊暢春園觀荷花復
命中官同泛舟周覽畢
賜宴兼

賜千葉荷花一餅恭紀

內直依天苑薰和殿閣風日陪丹禁裏身住碧霄
中嶺樹遙分翠池荷曉映紅忽聞傳召入聯珮接
芳叢

其二

西嶺千重水流成裂帛湖分支歸 御苑隨景結
蓬壺玉竦凌波迴瑶臺入漢孤上林曾有賦於此
見真圖

其三

祕殿臨流峻花磯就澗低荷呈千瓣艷葉覆一池

齊舞蜨知香戀游魚唼翠迷曠觀天上景自有石
邪溪

其四

湖映千林綠山圍一苑青花間開鳳閣樹杪出龍
亭香氣無邊散鶯聲不斷聽更看幽絕處漁網掛
烟汀

其五

旣歷芳岩勝中璫引畫船烟波青鏡闊楊柳碧絲
懸朱鷺晴遵渚金鱗晝躍川蘭橈經百轉何境不
棲仙

其六

翠幟依雕檻，銀塘敞玳筵。
接茵同畫卜，式燕自天。
傳酒借波光，綠肴含花色。
妍今朝風景，好喜荷渥恩偏。

其七

上苑芙蕖種，塵寰眼未經。
艷姿何灼灼，密瓣自亭亭。
折取從靈沼，分頒貯寶瓶。
拜恩瑤城下，光采耀仙扃。

其八

堯舜雍熙世，生爲侍從臣。
言聽薰瑟奏，來賞芰荷。

辰重綠全迎夏殷紅半奪春看花能到此蓬島復何論

七月七日從口外 離宮

頒賜御書臨蘭亭金扇一柄恭紀

金山泉脉繞離宮避暑偏宜養 聖躬天際絲綸
隨日下朝端章奏浹時通萬機不廢雲山興八法
常耽翰墨功忽自中涓傳 寵賚頒來瑤箒展薰
風

其二

永和修禊紀山陰真蹟曾傳祇樹林信本手追差

得法唐文心慕未能臨我

皇游藝臻神聖斯帖濡毫振古今復起右軍當北
面硬黃填廓不須尋

題同年張簡亭小像

弱冠同君折桂枝東華塵染鬢成絲故園爾我思
歸隱畫裏雲山空復爲

其二

看君道服似尋仙瓢貯丹砂若箇傳白鷺扇知爲

異物

南史張融事

楓林初試早秋天

送許秀山歸石屏省親

白雲紅樹送征驂丹鳳新從日下飛
萬里橋頭知擁路錦衣人羨著萊衣

其二

寧親身覺南雲暖戀闕心隨北斗長
法醞一杯桃一顆賜來天上倍馨香

其三

好鳥晴光一路啼石屏重問舊山谿
車前不用誇羈矢省覲何關祀碧鷄

其四

然藜閣下共論文杖履追陪藉洽聞
京國久經推

月旦莫耽丘壑滯滇雲

丙戌正月十五日

暢春園 賜內直侍臣

御饌恭紀

離宮別館上元辰綵勝珠幡映日新
金殿龍銜千樹豔繡廊鰲戴萬山春
簫傳舜樂情知美酒入堯樽
意覺醇共慶八紘同此日
皇穹咸照太平人

其二

上方寶饌已調蘭更荷金盤錫
御餐四海昇平逢令節
千秋知遇洽宸歡
燈垂螭鳳珠璣滿戲

列魚龍錦繡團拜荷
渥恩歸漸晚還憑火樹徹
宵看

送諭德魏無偽督學江南

廿載清時獨茹芝
新恩優入鳳凰池
謀謨自昔傳家笏
理學於今啓絳帷
六藝科條師道盛
一壺冰玉帝心知
會看南國人文正
不遣經生尚詭辭

送總憲吳匪菴假歸

鴻臚唱後識君時
玉立丰標映鳳池
猶記南宮同校士
冰壺清徹兩心知

其二

久陪東觀仰風騷更喜朋簪盍水曹
袁浦我曾銜命去瑤槭不惜寄秋濤

余曾督工袁浦
匪蒼寄詩相憶

其三

霜臺西峙玉堂東制草彈文兩不同
秋肅春溫都在手却將一筆佐天工

時匪蒼以總憲兼
掌翰林院學士事

其四

勇退如君壓萬夫錦袍令子笑相扶
此行羨殺鱸魚美一艇秋帆到五湖

題陳相國午涯山莊圖

元老勲名播八荒
午涯還勝午橋莊
天開甲第仙
山上樓閣春雲接太行

其二

粉本何須五嶽圖
五門佳氣卽仙都
公如峰頂中

秋月圓朗清輝天下無

名勝志載五門山在州治西十二里雙峯之上中秋

望月最爲圓朗他處所無

其三

已饒秦壁烟巒勝
兼愛江南山水奇
昨扈時巡

畱翰藻名區增重爲公詩

唐蘇頲錢盧澤州詩關路通秦壁城池接晉墟

其四

亦有園林谷水涯曾紆

鑿輅到山家

乙酉春車駕涖松

江越一日幸小園時鴻緒因職守畱京未曾扈從

今看畫裏雲峰美何異

丘陵見太華

書至于太華疏音如字

其五

禁殿追隨數十年每聽秀句憶林泉
天家儘有蓬壺境十賚堅畱玉几前

其六

張公歸去樂龍眠夫子於今正補天
媿我軟紅空撲面橫雲山下憶年年

余有別業在橫雲山下

題巢少司空畫卷

冬曹事頗冗曠觀興自逸猗維仁者靜溫潤金玉
質余性苦卞急矢口輒多失常恐朋僚間招尤在
坦率公氣備四時經畫有道術願借薰陶功一化
此中空暇日示畫卷爲言義所出行年四十九驥
子初生一好事贈茲圖綿綿期永吉乍展見奇峯
插天真翠嶺峰根萬丈濤浩瀚能浴日雲嵐護雙
松礫砢具沉栗叢桂鬱五榦繁香盜浮溢扶疎上
下巖輝映世罕匹宜封泰岱巔迴勝小山窟何處
得粉本有此韋偃筆高門世簪纓父作子必述八
柱列喬木五雲蔭縹帙淵泓公輔才器大膺顯秩

他時重披圖補袞寫亮弼

十二月二十七日

賜五爪寧緞二端中官傳

諭云此乃御用今特頒爾等時同被 賜者大學

士臣張玉書臣陳廷敬臣李光地也恭紀

尚衣南國重宮府織機絲章采尊王制龍蟲仰

帝儀貢來珍 御庫捧出惠台司忝列天喉舌分

榮拜玉墀

其二

文列雲龍燦封題日月光彰施驚 上服寵賚越

橫雲山人集卷之二十二
王章巧奪天孫織清分玉案香雙縑放入手珍重
費裁量

橫雲山人集卷之二十二

橫雲山人集卷之三十一

還朝集

丁亥春三月

聖駕南巡三月二十四日

駐蹕松江時

臣

鴻緒扈從歸里謹賦幸松歌十首

以紀萬民歡慶之忱云

六龍時邁下吳閩
滄瀆雲濤接海疆
重鎮旌旗開
壁壘金光中
閃羽林槍

其二

楊柳春陰繞五茸仙雲擁駕百花重上林繡嶺參
霄漢笑道烟鬟九點峯

其三

盆香徧野萬民心所過神祇亦獻忱天馬峰迎天
馬仗鳳凰山作鳳凰音

其四

春申浦水自朝東三月桃叢柳浪風八槩龍舟親
舉網神魚飛躍日華中

其五

天王 神聖寶天聰閱武掄文作則同舞鳳親揮

三寸管穿楊手挽六鈞弓

其六

羽騎千羣錦繡鞞春風競武
御筵前滿城士女
爭圍者說道 龍顏更少年

其七

寶塔燈輝火樹明綵棚絲管月輪生
海濱非遇
時巡日那得人遊不夜城

其八

閩苑蟠桃仙府麟野農芹獻萬年春
羣龍擁處紅
雲滿黃樹中間是 聖人

其九

遵海觀風久偃兵巖城歌舞慶昇平
天威直壓長鯨窟萬載東瀛浪不生

其十

行宮何異御離宮樂與三江萬姓同
安得袞龍多信宿暫瞻堯日慶雲中

三月二十五日

駕幸臣鴻緒賜金園恭請天庖虔設

御膳至帝子天孫皆於園堂書館肅治肴饌
亦製自官厨若夫伶人音樂取徑外戶以

至

御前承應蓋園門以內

駕至之後卽爲禁地非內官莫行也其餘扈從公
侯大臣金吾宿衛備陳百席饗於園首彩
棚之下或就鄰居精舍以分歛焉是日仰
荷

皇情喜悅玩賞花木自辰達未晝漏頻移真屬異
數舉家稱慶闔郡爲榮恭紀

昔年彩毼幸園林守職躬違警蹕臨今遇春城移
雉扇喜隨花徑聽鑾音池魚亦仰飛龍意巖草俱

紫向日心平地忽升霄漢裏 玉皇到處五雲深

其二

輝煌金榜署猶新香案揮毫閱二春

御題松竹二字已二年

矣翠竹時深垂鳳實蒼松歲久作龍鱗桃因天

盼花含笑

小園金絲桃以爲勝於他處上

鶯爲宸歡語轉頻

恰遇晴和風日麗水邊林下倍逡巡

其三

賜金歸橐買林泉雨度宸遊淑景天階下片雲

繞一壑巖間古木已多年

上云花木甚大知係舊園

流觀藤

架花如幄延賞湖瀾翠似鈿何意谷陽成小築濫

承雨露九霄偏

其四

苧城僻地絕芳鮮
甘旨何由奉御前
籍顛上方開品物
製祈庖宰自烹煎
三漿六膳羅金鼎
和芍調蘭入象籩
藉手芹忱聊獻壽
小臣還奏九如篇

其五

天樂神京有六師

周禮春官備六師

伶人下邑具匏絲

至尊偏却流風曲
雅奏惟調華黍詩
錦幔不遮雲出岫
翟軒無礙鳥來時
畱連泉石還移晷
端爲韶光景物滋

其六

黃離朱邸實駢闐玉葉金枝更比肩五色羣龍來
北極一輪紅日自中天鏘鏘扈 駕雲裾集藹藹
穿花雁序連何幸瑤光齊下屬山蔬亦得上瓊筵

其七

非因鑾輅下林立那得羣賢集絳騶金旂綵邊羅
宿衛龍棚花下列公侯雲烟繚繞停仙蹕肴核從
容薦野羞祇媿庖丁非善手未能仙液泛香甌

百席係家
庖所設

其八

裴相亭臺重午橋衛公泉石擅唐朝止聞詞客騰
瑤什不載名園歷鳳鏹此日桃谿臨玉趾一時
蓬徑倍春韶隆恩踰分榮無比編作雲間谷口
謠

是日蒙

聖恩賜東珠涼帽一頂石青團龍全爪緞銀鼠褂
一件寶藍團龍全爪寧緞袍一件萬壽聯
珠黃墜合包一對恭紀

咫尺羣瞻帝座尊喜傳天語盡春溫不嫌草

野儀文簡反惜臣家供具繁

中官傳

旨云朕偶
爾臨觀爾何傾贊供

應
藹藹弘慈同父母洋洋渥澤等乾坤解推自古
稱難遇華重無如此日恩

其二

機絲章采尚方殊璀璨光華世所無黃纓聯璣成

已勝

鷲黃惟上用

紅纓纏頂貫東珠

帽頂用紅纓結成

銀毫無

縫由天造

銀鼠毛片平潤一色

龍爪全施應帝圖昨見秣陵

親御著

上金陵教場閱武即服此袍帽

一時驚寵被微軀

其三

翟瑜侍輦藹春暄更沐榮光徧一門錦綺精純雲
奪目瑤筐頒賜日移軒園垂碩果咨先植庭有芳

蘭問後昆總是家人同一體儘容纖悉達重闈

是日並蒙 宮闈頒
賜家人絲物有差

中官撤

御前肴饌一百器傳

旨云製自天庖特賜爾全家嘗之

聖恩溫厚感激無地恭紀

三十年來內直頻 天厨珍饌日沾脣嘗攜餅餌
兒童喜未及家庭長幼均今荷瓊羞排滿案好陳
君澤獻先人餘將甘旨分親友細酌燈前闔戶

春

奉和澤州相國枉駕小園見贈原韻

數畝園亭谷水隈，重迎鳳輦闢蒿萊。
禽魚向日欣同樂，樗櫟成陰媿散材。
花徑乍移仙仗去，沙堤還見小車來。
知公不淺林泉興，羽爵相留且數迴。

其二

本是郊西一澗隈，六龍臨幸卽蓬萊。
蒼松繞逕爲

笙奏，修竹承風是笛材。

御題小園匾額松竹

此夕荀庭龍

侍坐

謂詰嗣學士公也

一時史館鳳俱來

時翰林俱集

叨

逢君相千秋事欲和，瑤篇首重迴。

午日舟次八閘，招陳咸京偕大姪麟照過飲。

皆紀以詩因次原韻

于邁欣逢午日長
畫橈前導溢恩光
蒲梢裊露縈
波綠艾葉含風繞
岸香水國龍舟喧
鼓樂郵亭鰲
極結縑緗昇平萬
姓歌遊豫
扈蹕書生合舉觴

其二

五絲采色爛明霞
風物催人歷歲華
契結金蘭耽
竹葉老辭紅粉妒
榴花看吟郢雪題
黃絹粘向蕭
齋護碧紗
聖世文儒皆顯擢
不須弔屈繼長沙

再疊前韻

牙檣錦纜漕河長
霄宇晴開曉日光
夾岸綠楊參

綺帳排堤黃案供盆香喜逢地節巡川嶽載得天
書盡縹緗隔舫袁宏詞賦手邀同小阮共浮觴

其二

到處邨莊五色霞迎饗節物鬪京華旗旛綵豎浮
江檝錦繡絲裝繫臂花對景暄妍揮小扇宜人單
袂試輕紗陪遊自媿無才藻應與閒鷗臥白沙

三疊前韻

入夏郵籤景漸長青簾白舫度時光雖無菰黍堆
盤翠是日舟中無黍角尚有蒲芽壓酒香簫管邨邨聞雅
奏樓臺處處見華絃畱髡此日應須醉小戶何能

倒一觴

其二

漫築園林映海霞
半生簪紱滯東華
每驚櫛沐蒙頭雪
羞對萱葵照眼花
遙憶松亭經鳳輦
此時奎藻護龍紗
及今已覺歸田晚
休復衣緇薊北沙

四疊前韻贈陳咸京

詞苑如君擅百長
鷄牕常費短檠光
久知經笥垂家學
共道儒冠醞國香
此去尚方資筆札
可從天祿借縑緗
江河日下文章弱
湖厥頽波孰濫觴

其二

仙骨珊珊佩紫霞豈同凡豔鬪鉛華霜蹄秋試燕
臺駿紅杏春探上苑花自有文章曾夢錦不談名
姓暗籠紗慚余宦達終無補空拂長安撲面沙

五疊前韻示大姪

過江羣從數誰長子也潛修愛景光世守青箱知
不廢家傳牙笏有餘香閒吟珠玉韜囊錦秘本丹
鉛檢帙細却怪老夫雙目溼倦拋書冊漫傳觴

其二

薦章辭隱海東霞重見茸城蒞翠華止道謝庭無
玉樹敢隨天苑作琪花從今官裏須勤績莫負貧

時獨浣紗四庫文章千萬卷讀書何異數恒沙

卽事六疊前韻

千里河流曲曲長波平如鏡閃晴光繞堤綠蔭槐
英密覆壠黃雲麥穗香高髻村優裝翠額禿衿野
老著黃緇蠲租賜復盈千萬難禁人民介壽觴

其二

誰言過客似雲霞也問民風與物華野蔓盡爲承
露草夕葵原是向陽花農勤錢鏹朝收黍婦急機
絲晝浣紗有道已登仁壽域上書何待賈長沙

題都諫史蕉飲春泉洗藥圖

柳篋雄才冠八區春光爛錦照青蒲昌時諫草原
多暇吟寫鶯花入畫圖

其二

憶從鳳沼掞辭華六詔遙乘奉使槎仙掖只今桃
李盛遶欄如看日南花

其三

百花深處醴泉甘洗藥何須訪菊潭想見鄴侯談
服食芝英風實滿筠籃

其四

春水新鋪碧簾紋一簾紅雨雜溪雲是中合有蓬

萊客鸞鶴風標冰雪文

其五

掖梧百尺鳳凰枝
埤竹千竿碧玉姿
左省晝長閒自咏
那知殊麗作歌詞

其六

紅橋綠柳映朱樓
駿馬尋芳記昔遊
自作夕郎畱瑣闥
遙憐明月滿揚州

趙東籬索詩賦贈

高風靖節迴堪師
小圃黃花玉露滋
一歲幾逢重九日
壺觴只合傍東籬

其二

雲物長安對晚秋半開紫豔慰離愁
渭南當日曾題句玉笛聲中倚酒樓

壽澤州相國

紅雲丹陛九重深廿載追陪侍禁林
每誦制辭同典誥閒聆軟語盡銘箴
龍緘數賜披貂紫鷄樹常畱和鶴陰
不是恩波偏獨渥天知冰雪老臣心

十一月十六日

賜硯一方恭紀

日趨祕殿五雲衢寶硯常蒙 賜近儒巧製昔容
孤管運大方今可四人俱雀臺遺瓦非瓊質鳳味
驚珍豈玉膚謾道東坡能品物銅雀風味東坡俱有硯銘未曾
天府見清腴

戊子三月 日

賜人復三觴恭紀

天上瑤光宿山川蘊地精昔名推上黨今產重陪
京天府籛箱貯人間銖兩評何期頒瑞草徧賜及
諸卿自揣姿原弱惟斯可衛生終朝尋市賈兩鬢
在霜莖鷄腿猶堪貴人形果是頑黃封今入手紫

氣實爲英返老知容易長年荷 聖情

閏三月二十一日

召大學士

臣

張玉書

臣

陳廷敬尚書

臣

王鴻緒偕

內直詞臣遊暢春園列五席席十二盞復
賜御饌八肴御點八金盤宴畢謝

恩隨

命中官泛舟引至各院看牡丹歷竹徑魚塘登湖
中平臺仰瞻臺上層樓復移棹遊玩至午
後方出恭紀

暮春首夏百花天上苑朝來 詔旨傳樞要忝隨

綸閣後清華猶占鳳池前甘泉紫氣和仙饌太液
晴光映綺筵更荷金盤分玉案摘詞難罄謝恩箋
其二
貂璫同上木蘭舟引入天香洞府幽魏紫姚黃成
萬本鞞紅蓮白亦千頭鳥知色豔來爭語蝶愛花
深去復畱霞采一庭成濯錦人間那得此丹丘

其三

歐陽昔品牡丹花元白先經詩裏誇只道遊春尋
勝事未聞延賞得天家君逢明聖多恩澤時際
昇平有物華須記御園靈異處雲霞五色燦仙

葩

其四

更從別苑一經遊也是名花無數稠葉葉枝枝俱
作態高高下下欲凝眸瑤臺香透琴書潤龍案雲
生翰墨浮 聖主清平渾不尚虞歌有道自千秋

其五

竹院清幽敞 御亭千竿修挺拂雲青淇園如篔
簹傳詠冀野成林未見經祇爲蒼琅 天屬愛移
來上苑地呈靈始知造物無南北總仗丹青雨露
零

其六

苑裏芳湖百頃光
甃成文石養魚塘
繞堤楊柳凝深綠
傍岼菰蒲散曉涼
波面遊鱗常出沒
水中香餌自低昂
到來至樂同濠上
尤覺天池生意長

其七

瓊樓瑤館是蓬萊
錦石爲階玉作臺
當面水光平若簟
四圍山色翠成堆
懸廊好鳥千般語
向日奇花萬種開
仰視中間龍座迴
共從簷下一徘徊

其八

已從步履歷芳岑
更泛蘭舟轉碧潯
無數花間圍

別院有時巖畔見雙林
呦呦草際鳴仙鹿
剪剪波心掠翠禽
一出閨風疑夢裏
幾回欹枕費思尋

壽朱竹垞八十

憶昔承恩供奉班
甘泉獻賦五雲間
秋風忽爲鱸魚去
廿載躬耕海上山

其二

先生史筆紹龍門
勝國賢奸抵掌論
今借選詩潛寓意
名山自作一家言

其三

松雲白首是神仙
試比前人若箇賢
四座鬚眉如

洛社一樓煙雨勝平泉

其四

憐余少日共詞場百學無成鬢已霜八十翰君還
著述東南人重魯靈光

送宋太宰致政歸里

東曹人物待持衡風采文章冠六卿一疏直陳稱
篤老西陂松菊爲多情

其二

御製新詩餞別筵 賜遊天苑幾畱連鑑湖當日
稱高尚况比知章早十年

其三

檜柏蒼顏海鶴姿
乞身猶及未衰時
瀕行天廐頒龍馬
矍鑠登鞍苑外騎

其四

龍馬牽來萬衆驚
風稜奕奕是星精
久經天子

親乘坐不向中
達不官行

賜馬只官走
中道故云

其五

彭澤歸田爲督郵
青陽還第豈真休
誰能主眷

方隆日不戀三公
戀一丘

其六

書苑書家鑒別精詩篇久擅五言城共知風雅歸
盟主林下還能引後生

其七

廿年開闢鎮江鄉吏帖民安樂歲康去後東南多
水旱那教人不憶甘棠

其八

二疏帳飲列東都盛事流傳入畫圖今日 兩宮
恩禮渥丹青寫得許多無

其九

上相天卿并一家兒孫牀笏更交加東山樂事真

無限栽遍人間富貴花

其十

通門兩世幸相於風月清談味有餘
一別幾時重載酒睢陽魚雁好貽書

橫雲山人集卷之二十三

橫雲山人集卷之二十四

雲間王鴻緒儼齋撰

谷口續集

己丑正月二十三日蒙

聖恩矜全以戶部尚書解任歸里漫賦

十五年來滯帝都愧無勲業佐凝圖
君恩未報終因拙臣跡難明本是愚
幸荷天光還自照也容腰組得長紆
明朝一艇烟波去閒與浮鷗伴五湖

其二

從今不聽景陽鐘谷口歸耕作老農
春雨濕林聽

布穀秋風熟稻肥
句龍官租課僕勤
終畝長計攜家隱
半峰欲學宗元思
報國無才歌雅紀
勲庸

別少宗伯伯氏總憲仲氏四首

旃車夙已駕言邁
歸故鄉繾綣別同
氣對酒不能觴
陰雲正萬里安靚
白日光迴企雙鳳
闕霄漢邈難望
但見盧溝野鴟鴞
鳴我旁世路多嶮
巖何由履康莊庶
幾忠信心邀鑒於
天王

其二

伊昔三荆樹產自崑山
阿移栽上苑中
雨露交枝柯分輝
槐棘地掩映金鑿
坡濃葩耀省日落
英覆

宮莎自葉流至根朝夕承恩波荏苒十數載祇覺
春風和一榦忽零霜生意嗟婆娑衰榮各有時安
得常阿難靜思造化理往復將如何

其三

一身嬰世網患生疑似端甑中拾塵煤李下整纓
冠事跡未分明心目固所歎黑白無定情江河罕
停湍處睽勢旣隔顛天理復難踟躕以嘿嘿愁緒
不能殫欲告同門友已異夙昔歡三復鵲鴿章飛
鳴含辛酸

其四

宵夢見大海波浪日月昏乘桴如一芥又際巨颶
辰驚怖魂魄散惟待鯨魚吞醒來一伸足罹險脫
爲人吾生所遇舛幸荷天心仁還鄉事耕稼俯仰
樂堯春歲時上塚墓猶得垂朝紳餘恩等帷蓋送
老窮崖垠回瞻廟廊上伯仲恢經綸夙夜矢靖共
勉作稷契臣無似弟鹵莽偷生爲幸民去去遑復
恤棄置難重陳

出京

春風不相貸此日別京華客路三千里圖書四十

車

劉禹錫詩有漫讀詩書四十車之句

河橋方結柳野戍正繁花世

網欣無滯餘生未有涯

曉行

春色曉淒迷 征行信馬蹄
天晴紅日大 野曠白雲低
林鳥凌晨出 村鷄自遠啼
青青無盡草 隨意滿前蹊

客途憶兄

春光辜負客途中 早晚輪蹄日日同
綠柳荒村迷宿霧 白楊古道有淒風
原頭搖尾憐飛鷓 天際哀鳴見斷鴻
歸思離愁渾作惡 雲山何自到江東

自笑

自笑年來止嘯歌生涯何意遇驚波宦途窄處擠
排衆國是爭時恩怨多碧落有雲終浩蕩太行無
路不嗟我如今散髮歸林下靜對門庭鳥雀過

江南

自分穉生七不堪漫隨上宰混常參五更鐘漏催
趨苑長日觚稜話釣潭鷓侶於今辭薊北鶯聲媚
我到江南還家料得新筍熟一醉花間處士菴

余與

澤州相國前後內
直幾及二十餘年

老夫

十丈紅塵滿帝都今朝野趣領歸途始知造物無

偏意不吝青山與老夫

其二

百年縱計合當休歸去田園可自由有意鶯花偏
媚眼無情霜雪任盈頭

其三

哀樂此生原不定且憑身世與天遊潯陽白傅還
多事絲管聲中亦惹愁

客行

離京已旬晷兀兀行不休肩輿歷古阪夷險安能
謀歆側高復下簸蕩如浮舟所幸仲春月曠野風

氣柔桃岡色將放水遂融成流萬物欣有向一身
將奚謀跼踏宇宙內無地可自由亭午始投店砂
礫雜飯甌芣苢暫半晌鈴鐸戒前轡余曷敢憚煩
逼側隨行騶崎嶇數十里義馭沈西疇空林歸鳥
雀山徑下羊牛役車各云止欲進罕爲儔解裝聊
就枕翼作真人遊苦被雞聲聒不寐縈深愁百年
如過隙吾道長悠悠

柳絮

上苑春深百種花開開落落在天家靈和柳絮綵
何意飛出宮牆到水涯

高唐州遇微雨

客程漫道高唐路此地曾無雲夢臺神女楚天空
萬里不知暮雨爲誰來

道旁桃李

灼灼桃李花半開還半謝人來自成蹊春風不相
借

過荏平縣

當年石勒傭工處耕野常聞鞞鐸聲亂世英雄原
易起遂令青史得垂名

晨發書途中所值

雞鳴戒前途四野星猶爛僕夫整馬羈騶人拭車
幔帶夢事盪櫛舉眼路瀾漫逾時稍喜微瀛海陽
烏煥時當仲春月挑柳連岡燦頗覺淑氣催頓今
愁懷散俄然黑雲生狂風何暴悍動地捲沙礫安
辨昏與旦猛如屋瓦飛怒若角弓彈輿傾難復升
馬駭不可絆同旅數十人一一奉頭竄阡陌莽回
迂男女錯叫喚未省一日間何遽險夷判評理或
適然遇憂難自按望門阻投止徙倚至夜半

南池

遠邁古任國駕言遊南池綠楊蔭廣岬清流溢長

陂繁花映睥睨婀娜春風姿高亭翼其上觴詠堪
於斯憶昔東歸日霜深秋氣悲今當去國候駘蕩
遇芳時緬彼李與杜才大天下奇鴻名擅千載勝
蹟傳來茲不知是此地或後增飾之卓哉樹不朽
願以前賢師

聞煒兒感寒旅店

弱質嗟畱滯朝朝望北音風霜經路久時序入春
深握粟頻從卜求醫何處尋惟期勿藥喜慰我萬
重心

旅店翰林潘雪石吏部張涵六見訪兼貽酒

饌

賀監傳觴地流芳異代同
冰衡推吏部經術擅扶
風逆旅歡相得家珍味不同
風霜松柏意款款話
何窮

喜煒兒至

不見苦經月
今宵旅店中
全家移自北
歸棹好從
東明日郵籤
啓春泉牖口
通休官原足
樂吟對岍
花紅

抵家園

自入京華十五年
每從芸閣憶歸田
今尋朋舊渾

非昔重對園林却惘然巖石雖存遭雨塌窗梧已
老半藤纏不堪歲月經荒穢輒愧旁人說輞川

里門

少小嬉遊地平生極不忘里門猶自昔表樹尚成
行烟火增新聚耕耘雜古岡獨憐宦歸者訪舊幾
存亡

其二

晚節安田井生涯問稻梁普天休戰伐率土慶平
康父老恬逾健丁男幼已強一官今卸責隨分樂
虞唐

其三

始祖從南渡由明溯宋元簪纓常接武詩禮自成
尊聚族稱通里詒謀啓後昆流芳五百載烏巷峙
江村

其四

吾父真英傑興朝振羽翰世人推賈誼天子重嚴
安入對麒麟殿埋輪解豸冠歸來勤訓子經史夜
深看

其五

伯也聲華早聯騰季仲名一門登雁塔八座竝天

京羣從皆翀舉庸兒亦仰鳴非因祖德茂曷以致
恩榮

其六

伯仲驤雲路子身可退耕 一人憐闇昧流俗雜
嘲評從此安巖谷相期應踐更閒來無所事海畔
狎鷗盟

其七

靜想一生事儒家意味長輪蹄空碌碌書史竟茫
茫鉛槧資新彩縑緗得古香窗松和我讀風至似
笙簧

其八

頗愛幽居僻桃花占一村海山晴到檻春水曲當
門經月無賓至終朝惟鳥喧厨中新酒熟獨酌把
匏樽

得總憲仲兄書率荅

忽見雲中雁翩然有素書爲言經久別不審意何
如報道春暉好揮絃芳晝餘行藏付烟海天地一
蘧廬

夜

入夜闌千月映明碧紗小帳晃秋清老人總是愁

無寐不厭階前蟋蟀聲

老儒

教授數家村負薪還讀史
牢愁無處發罵古不平事

長門怨

憶昔承歡宴芳蘭鳳幄溫
長門今寂寞夢裏謝君恩

其二

墮雨不可收往事何須記
惟願新所歡黽勉承君意

閨思

妾思尋無路卽行詎有方數年千里別惟月共清
光

酬焦廣期陳咸京卽事次原韻

頭白常嗟汗簡遲遺編空負滿書帷兩賢夙昔耽
羣史千載論量在此時野乘見聞多選出朝常忠
佞幾人知生平三復昌黎札未敢無稽妄置辭

劉秀才書也

扁舟

扁舟凌清風客問何所適荅往橫山下茅齋看石

壁白雲時自生可以娛朝夕

閒居

屋裏青山避世家終朝雲影度窗紗
吾生到處還堪足花事逢春殊未涯
溪友過橋攜旨酒詩僧隔寺餉
新茶林間不是愁無伴閒說桑麻送歲華

朝醒

罷官林壑樂昇平步履閒遊寡送迎
修竹傷人常意逸青山到眼倍心清
任憑物理爲榮落無事天公計
兩晴冉冉桑榆應止境好將萬事付朝醒

高齋

身世閒吟日幾回
高齋新築碧巖隈
無邊川上雲開闔
不斷花間鳥往來
見客何妨容皂帽
酡顏可喜足村醅
從今一醒東華夢
至樂山中有散材

漫興

卜築林居傍柳濱
背山臨水碧鱗鱗
得盟白鷺爲新友
不改清陰有故人
滿屋琴書承世澤
中廚鮭菜作家珍
閒歌梁父綠何事
瀟灑春風岬角巾

曉陰

一丘一壑足平生
寂寂張羅自掩荆
夜雨乍收應覺曉
重陰猶布未爲晴
飛鳴每急懷兄弟
耕鑿粗

峭壁綿延聳峙加以叢林蔚蒼目不能窮
西則俯瞰深潭上有石臺高能翳日如斧
削然北則障於山而小澗縈之聲淙淙不
絕匯入含清堂之池南則平疇萬頃清川
數百道野色湖光若投我襟帶間可函受
焉昔此山以陸氏得名二俊入洛適際時
艱臨難而嘆華亭鶴唳不可得聞余於子
丑之交風波叵測幸遇

天子明聖獲保全身名以歸登斯亭莊有雙鶴晨
夜長鳴時得聽之較諸往哲所遭不已優

乎

重巖聳兮出羣木扶筇躡雲兮紆且覆高亭翼然
兮架五檠解衣盤礴兮豁心目海鶴一聲兮如裂
竹茫茫宇宙破慘黯回想我生兮何踟蹰今依深
谷兮爲方穀永謝塵紛兮返初服

桂臺

桂臺者在聽鶴亭之上有石梁跨小澗攀
雜樹陟巖嶮必健者先登臂援而後得升
過修篁徑折而東臺長里許卽含清堂之
石壁頂也下視碧池及堂宇之湘簾綺窗

掩映如畫臺北寬不及丈又有層巒翠削
聳而入漢與臺相竟上列老桂數十株每
到花時香氣滿山丹楓雜之紛紅駭綠殆
不可狀由臺而下崎嶇幾難施足而東首
石勢數仞若崩雲之將落遊者至此輒爲

神悸云

高峰屹立兮亭對峙中有一澗兮水清泚石梁橫
駕兮石齒齒遊者捫蘿兮不容履升臺氣舒兮平
如底青桂沃若兮倚嶺嶠淮南小山兮差可擬八
公招隱兮良有以結幽棲兮冥臧否宅神虛無兮

從此始

朋雲草堂

朋雲草堂者內桂臺而東居山之麓背有翠屏百仞如斧戾左則危峰環抱右則山岡縈轉堂面南離俯臨石池闊二三畝水清淺中有芰荷菱荇怪石累累若麋鹿之飲於溪澗四圍茂林修竹雲日蔽虧柳子厚所謂奧如也然則何以名朋雲蓋取盧浩然雲可朋兮赧可吸之義以橫雲爲友云

複嶂崇巖兮巖幽庭樹竹蒙籠兮煙冥冥石牀斐
几兮凝空青日月延戶兮雲爲扃于斯結隱兮諧
山靈囊有偓佺之丹經年齒雖邁兮思鍊形太和
食氣兮養黃寧倘邀王母兮餉仙醪不敢私兮貢
明廷願奉 聖人兮延千齡終身茹藿兮有餘馨

七峯精舍

七峰精舍者父老言橫雲居九峯之第七
故曰七峯而山之秀峻特爲九峯之冠遂
於此結精舍在朋雲草堂之東自西麓行
數百步躋石磴而上結宇於山之腹敞五

楹中奉大士焉前有石臺俯深潭水清多
見石後作軒軒外有潭峭且深莫測其源
潭上石壁插雲較諸峰爲尤聳其坡陀處
左右修篁萬竿而蒼松古柏高梧老樹列
於精舍之南者千餘株故春夏之時密翠
幕天止漏日色凡遊人酒舫掩映林外而
不能窺精舍之幽邃奇麗也憩息於此輒
爲永日

蒼翠接雲兮壁百尋寬然邁軸兮儼珠林前後芳
潭兮涵清冷喬木參天兮夏日陰陰幽鳥嚶鳴兮

求友聲山僧杖錫兮來結盟此間一座無公卿願
脫世網兮叅無生

松臺

松臺者在精舍之右巖巒對峙中開石徑
摳衣躡磴乃上其巔臺廣數丈餘有松二
三十株蒼皮翠幹宛作龍形清風一來韻
叶笙簧令人悠然自遠臺後有澗泉蓄而
不涸上復有翠巖爲屏障臺左有峰中斷
而巍然獨立駕梁以度下瞰精舍之石池
跌坐其頂惟恐失墜不敢轉側而遊人從

下望之若天際神仙也居高位者毋乃類

此

蒼松羃嶺兮青濛濛翳日映月兮聲璫瓏逶迤雲
路兮盤顛穹虬枝偃蓋兮成仙宮扶筇幽境兮寫
憂忡耳邊謾謾兮聞清風居高而危兮施存雄悲
天憫人兮終數窮百年過隙兮將無同味道養氣
兮得肥克倘佯丘壑兮安廼公

此君山館

此君山館者以其前皆修竹參天圍繞山
徑故以是名也然勝處不盡修竹人造斯

館者由精舍而益東過紅橋歷小澗左有
高峯障西日峯下有潭水清可鑑築石高
丈許結宇其上陟數級乃入館朱檻綠陰
一塵不到後窗仰視石壁千尺或如齒鋸
或如斧斲大者小者鏤成一片天然位置
似荆關董巨得筆於此者洵乎造物之巧
也乃知人勝尤不若天勝

丹霞碧澗兮築仙館琅玕結綠兮光璀璨終日清
飈兮塵埃斷巖石爲供兮恣耽翫竹聲蕭蕭兮無
間昏旦俗襟相對兮翻汗漫此中只可容中散

楓巖

楓巖者道從精舍之東參竹林坐籃輿度天然橋循曲澗折而東又折而北兩邊皆山脊中縈細路仰而登數十級有古松盤旋虬枝翠蔭殆百年物爲之稍憩又宛轉數十級有平臺鋪氈可坐十餘人北面皆石壁高踰城墉長數倍之其下有楓林秋時霜深丹紅耀日雖滿山皆是而此地爲尤勝杜牧之所云停車坐愛者有同情也從此更上自松嶺而陟山巔矣

九峰八月兮皆秋容丹楓滿山兮惟雲峰霜氣入
林兮攢芙蓉紅霞映壁兮光重重點染萬壑兮酣
醇醲裙屐陟嶽兮幽人蹤坐愛斯景兮至下春絳
巖寂歷兮聞暮鐘

斗姥閣

斗姥閣者居山之最高處左則天馬神巖
鳳凰諸峰環列雲表勢若相顧右則崑峯
秀峙泖濱湖光萬頃風帆出沒杳靄無際
北望則崑邑之馬鞍常熟之虞山青螺數
點隱見天末憑欄南眺則五茸烟樹縹緲

在目也夫天下名山多矣余遊屐所經魯
之泰岱觀日出於扶桑燕之西山矚居庸
之紫塞推而極宇宙之奇勝亦髣髴無過
是矣然身歷其境不能數日畱未若茲山
之爲我有可以朝夕玩也故取樂務約乃

嗇神之一術

山之巔兮建傑閣星辰垂象兮禮碧落士女膜拜
兮珠履錯布金焚頂兮或歌兮思遊五嶽兮終落
拓不若到此兮樂其樂憑欄肆眺兮合冥漠大泐
波瀾兮氣磅礴吳山萬點兮烟雲泊五茸迷離兮

似辨城郭何時聳身太虛兮控白鶴一脫塵寰兮
自寥廓

修篁臺

修篁臺者下斗姥閣而西行山脊二三里
勢稍下土氣滋潤發爲修篁自頂至麓不
知其幾百萬竿也又稍南山形聚而爲臺
臺之西爲鄰家之菜菴臺下有池池上竹
成林竟畝擬築室其間挹臺之蒼翠以作
吾室之北屏暇則於此坐匡牀點周易窮
天人理數焉

修篁叢翠兮石嶙峋自山被麓兮迴無垠高臺突
兀兮聳蒼旻峭禱杳藹兮無纖塵築室其下兮可
凝神回憶世網兮牽朝紳進退觸藩兮幾危身何
若茲山兮養我真推行羲畫兮窮天人

附湯少宰西崖題橫雲山莊圖

勲名直與古爲徒丘壑從知道不孤瞥眼由拳

郊外墅平泉木石輞川圖

早分霖雨到人間棟宇烟雲日往還指點玉屏

金柱好共言申甫此家山

生綃一幅武陵源曲浦迴塘款乃村明月三更

淞上笛芙蓉九朵恰當門

秋來紅粒夏青秧十里平疇秔穉香也是午橋

裴令意要將餘興看農桑

誦法平生孔與周講堂微義足研搜早聞別派

驅揚墨一疏江河萬古流

清言問對寄樵漁博物高文味道餘池上詩情

許誰似一船雙鶴白尚書
烟波點點出帆檣咫尺仙
家浮玉堂好手爲公

摹寫得太湖三萬頃波光

經游謝墅十年中凋悵橫
雲目未窮今日江南

好樓閣紅菱兩過白蘋風

宗臣宿德荷殊知特詔溫
公書局隨獨樂園

中最相憶合先臚膾次尊
絲

柳橋波細殿山春他日追
陪杖履親只恐調元

黃閣老五湖未許乞閒身

附蔣閣學西谷題橫雲山莊圖

葑塘遙接秀溪灣走馬橋
西水石寰絕勝尚書

南北宅平分內史弟兄山
池邊靈鶴聽琴舞簷

畔孤雲作雨還容易林泉
高枕卧天公只許暫

時閒

吳郡名園數辟疆橫山今
說大農莊引來活水

開蓮沼生就丹崖築桂堂
曲檻蘋香看闌鴨陽

坡草綠散羣羊石湖鏡有
田園典門外新栽十

頃秧

坐對芙蓉幾疊屏一峯高
竝九峯青洛陽舊業

成花圃僕射新堂接鯉庭
掃徑有人思擁帚問

奇無日不橫經兩行官燭繙書夜莫認人間野
史亭

圖畫分明記永和樂天難忘是東坡春風拂濯
王恭柳秋水浮沈道士鸞園圖由來平野少樓
臺好在得山多須公調燮功成後泖口從容一
棹過

橫雲山人集卷之二十四